



PROCLAMASHON DI PRINS FULL I PANCHO SWING

Nos, PRINS FULL

eligi cu gran mayoria, cu tur democracia di mundo, cu inteligencia completo, cu apoyo, respaldo y aceptacion di casi un mayoria absoluto, pa un jurado di personanan cu conoce bon humor, pa e pueblo yen dignidad di Pais Aruba;

PRINS CARNAVAL 1986

PROME MINISTRO di henter teritorio Pazuid y Panort di Brug;

MAESTRO absolutamente su so di galanteria y ainda soltero; PATRONO di tur persona cu nan number ta termina cu «A» pero solamente di sexo femenino.

MINISTRO DI INTERIOR cu bao di su mando Urirama; Butuc; Koerieboerie; Boedoei, Mon Pos; Asiboca; Kurimiau; Zumbo; Roncado; Shete y Jucuri;

Y PANCHO SWING

Pa destresa, intelectualismo, inteligencia y tur gracia di su PRINS FULL;

MINISTRO DI EXTERIOR cu bao di su encargo California; Montana; Dakota; Colorado y Washington, Den America Latina y Central, Paraguana, Barcelona, Savaneta y Cumana;

MINISTRO DI EDUCACION pa tur mucha mucher cu kier defende nan honor contra asaltantenan y atracadornan

CONSIDERANDO

Cu pa sigui mantene un exito grandi den celebracion di Carnaval di Pais Aruba, ta mas cu husto pa tuma e siguiente puntanan na consideracion;

TA DECRETA:

1. Ministro di Defensa lo tin su sede den Fort Zoutman. Lo busca e dos cañonnan dilanti oficina di APANV y instala nan ariba Willem III Toren pa defende Pais Aruba contra Star Wars si ta necesario.

2. Nos lo percura pa por fin Aruba haya su Crematorio, y como cu energia y combustible ta mucho caro, nos lo construi e Crematorio na un caminda cu energia natural y esey ta San Fuego.

3. E prison pa Pais Aruba lo no ser construi na De Vuyst Field pasobra tin pista di aterizahe den cercania. Nos lo laga contrui e prison na un caminda central cu ta pas mucho mas cu su number y esey ta na Paradijs.

4. Como cu nos tin Corte di Prome Instancia y corte Superior caba den Pais Aruba, lo bini tambe un corte pa casonan di divorcio ya cu mucho caso ta tuma lugar den e cortenan menciona. Lo construi un corte di divorcio, y na un lugar cu ta pas mas bien cu su number. Esey lo ta Bringamosa.

5. Pa evita cu bomberonan na lugar di paga candela ta muha edificionan pa spaar awa ora cu tin awa, lo construi kazernenan di bombero en varios distrito. Ta ser pensa di establese esakinan na Dam di Cas Ariba, Dam di Moko, Dam di Rooi Afo, Dam di Fontein y hasta lo tin problema di falta di awa despues.

6. Un problema grandi cu nos tin ta transportacion di hende malo pa exterior. Esaki ta ser critica hopi. Pesey nos lo construi

un hospital ultramoderno pa evita di manda patientnan pa exterior. Cu avion nan por ser transporta di Dr. Horacio Oduber pa e hospital nobo cu lo bini na Matadera.

7. Pa evita estorbonan den Staten, nos lo saca foyeto cu Reglamento di Orden, splica estilo Kleuterschool pa asina cada Parlamentario sa su interpretacion. Tur anochi cu rayo laser lo proyecta un articulo di nos constitucion na cielo pa asina e pueblo por conoce su derechonan tambe.

8. Pa implanta respet durante temporada di carnaval, for di awe tur hende ta cuminsa usa e nomenclatura SHON, entre otro Shon Ministro, Shon gobernador, Shon Senador y shon Kita cu Shon Bubú. Esnan cu dirigi otro cu BO of ABO por ricibi multa severo di 8.2 cien florin of 100 dia na Paradijs.

9. For di awe tur hende homber den Pais Aruba ta bay traha cu Bachi y Dashi. Hende muher muher bisti shimis preta pa muestra nan forma y tur otro trahe ta prohibi cu exception di maternity.

10. Pa dicidi ariba independencia of no, lo tene un referencum dia 11 di Februari durante kima-miento di Momo y resultado lo ser duna su diasabra siguiente dia 15 di Februari. Lo tin solamente dos pregunta ariba e formulario. 1. Bo ta pro- independencia? 2. Bo ta contra independencia?

11. E tempo a yega pa mehora nos situacion financiero deplorable. Pa esaki lo bay kita e impuesto di 8.2 porciento door di aumenta tur salario cu 8.2 porciento y rebaha tur articulo cu 8.2 porciento y rebaha awa, coriente y telefon mescos cu e prome 101 dianan di carnaval.

12. Pa promove industria no mester di rapport di un millon. Nos lo lanta un fabrica pa procesa sangura pa exportacion den bleki di souvenir of Aruba.

13. Pa fomenta turismo lo construi e yachthaven na Boca Mahos. E lugar akli ta ideal tambe pa sambuyadornan. E lo ser propaga den exterior cu e lema: «In

Aruba you dive and try to stay alive».

14. Nan ta bisa cu Plaza Libertad ta zink. Pa evita esey lo construi bao di dje algun boto di ponton pa e keda flota den oranan di emergencia.

15. E proyecto di Golf Course ta wanta pa hopi aña pa motibo financiero. Nos lo construi e proyecto porfin y pesey lo prohibi pa cera e buracan cu ta conduci Brug Natural. Nos lo tin un golfcourse cu hoy natural y cu cuanto buraco cu golfistanan kier.

CONCLUSION

Durante CARNAVAL 32, ban demonstra civismo, pa laga mundu sa cu nos ta un pueblo cu caracter; ban sigui duna respet pa tur nacion respeta nos tambe. Ban haci nos wega di carnaval e wega sano y disciplina. Ban sigui mantene e lema cu pa 32 aña caba nos tin; esta cu Aruba su carnaval ta esun di mas sigur den henter mundo.

GOZA NOS CARNAVAL CU ALEGRIA, SEMBRANDO ASINA ARUBA SU SIMPATIA

PA GOBERNADOR;

Nos Gobernador a tuma rienda di Aruba dia prome di januari 1986, esta 26 dia pasa. Ta mucho prematuro pa deport'e pa exterior y ademas, ta prerogativo di Reino si ta haci esey of no.

Pesey, nos ta dun'e e encargo pa subi Willem III Toren pasa pa tercer piso, y for di eynan vigila paso di e Gabinete Arubano.

E gabinete di ministronan Arubano na su turno ta subi dak di Toren y for di eynan vigila bandera di Gobernador durante temporada di carnaval. Nan tampoco no mag bandona nos isla durante e periodo aki.

PANCHO SWING ta keda encarga pa ehecuta e decreto aki di tal manera cu el a ser formula y presenta.

Duna, firma, y sella; na Palacio Gubernamental «Surprise:

y Castillo di Gobierno «Heidelberg»;

Pais Aruba S.A. Isla di Carnaval;

26 di Januari 1986